

Heri Wenye Kusadiki



SABATO MCHANA

Somo la Juma Hili: *Yohana 8:54 – 58; Mwanzo 12:3; Rum. 4:1-5; Yohana 12:1-8; Yohana 19:4-22; Yohana 20:19 – 31; Danieli 2; Danieli 7.*

Fungu la Kukariri: “Yesu akamwambia, Wewe, kwa kuwa umeniona, umesadiki; wa heri wale wasioona, wakasadiki” (*Yohana 20:29*).

Kwenye kitabu hiki chote cha Injili, Yohana anao watu katika namna zao anuwai – watu wenye mazingira usuli mbalimbali, imani na uzoefu – wote wakashuhudia Yesu alikuwa ni nani.

“Tazama Mwana-kondoo wa Mungu!” (*Yohana 1:36*). “Tumemwona Masihi” (*Yohana 1:41*). “Tumemwona yeye aliyeandikiwa na Musa” (*Yohana 1:45*). “Rabi, wewe u Mwana wa Mungu, ndiwe Mfalme wa Israeli” (*Yohana 1:49*) Je! Haimkini huyu kuwa ndiye Kristo? (*Yohana 4:29*). “Sisi tumesikia wenyewe, tena twajua ya kuwa hakika huyu ndiye Mwokozi wa ulimwengu” (*Yohana 4:42*). “Bwana! Twende kwa nani? Wewe unayo maneno ya uzima wa milele” (*Yohana 6:68*). “Bwana, mimi nimesadiki ya kwamba wewe ndiwe Kristo, Mwana wa Mungu, yule ajaye ulimwenguni” (*Yohana 11:27*). “Nalikuwa kipofu na sasa naona” (*Yohana 9:25*). “Tazama, Mfalme wenu!” (*Yohana 19:14*). “Mimi sioni hatia kwake” (*Yohana 19:6*) “Bwana wangu na Mungu wangu!” (*Yohana 20:28*).

Baadhi ya watu hawa walikuwa ni nani, na ni kwa nini walishuhudia hivyo kuhusu utambulisho wa Bwana Yesu?

**Jifunze somo la juma hili unapojiandaa kwa ajili ya Sabato, Novemba 16.*

Kumrejelea Ibrahimu

Yesu hakuona haya kutangaza kuwa Yeye alikuwa nani, wala hakisita kuita mashahidi kumshuhudia kwamba Yeye alikuwa nani, hata mashahidi waliokuwepo zamani za kale, akiwemo Ibrahimu. "Ibrahimu, baba yenu, alishangilia kwa vile atakavyoiona siku yangu; naye akaiona, akafurahi" (Yohana 8:56).

Kwa nini ushuhuda wa Ibrahimu ulikuwa muhimu hivyo kiasi cha kuhusishwa katika injili ya Yohana? (Mwa. 12:3; Mwa. 18:16-18; Mwa. 26:4; Mt. 1:1; Mdo. 3:25).

"Kupitia kielelezo na ahadi, Mungu alimhubiri "Ibrahimu habari njema zamani." *Wagalatia* 3:8. Na imani ya mzee huyu ilikuwa imejengwa juu ya Mkombozi ajaye. Kristo aliwaambia Wayahudi, "Ibrahimu, baba yenu, alishangilia kwa vile atakavyoiona siku Yangu; naye akaiona, akafurahi." Yohana 8:56. Kondoo mume aliyetolewa badala ya Isaka alimwakilisha Mwana wa Mungu, ambaye angetolewa kafara badala yetu. Wakati mwanadamu alipohukumikiwa kufa kwa sababu ya uasi wa sheria ya Mungu, Baba, akimtaazama Mwanawe, alimwambia mwenye dhambi: "Ishi: Nimepata fidia." - Ellen G. White, *Wazee na Manabii*, uk. 165.

Ibrahimu alikuwa baba wa taifa la Kiyahudi. Alipokea ahadi ya kwamba, kupitia kwake, mataifa yote yangebarikiwa. Ahadi hii ilikuja kupitia kwa Masihi, aliyezaliwa kupitia katika nasaba yake.

Ibrahimu alikuwa pia baba wa wale wanaomwitikia Mungu katika imani (Ebr. 11:8, 17-19). Utayari wake kumtoa Isaka mwanawe (Mwanzo 22), mwana wa ahadi, haukuwa tu uthibitisho wa imani bali pia dirisha katika mpango wa wokovu.

Bwana Yesu aliposema, "Ibrahimu, baba yenu, alishangilia kwa vile atakavyoiona siku yangu" (Yohana 8:56), viongozi walijibu, "Wewe hujapata bado miaka hamsini, nawe umemwona Ibrahimu?" (Yohana 8:57).

Jibu la Bwana Yesu lilikuwa la kushangaza. "Amin, amin, nawaambia, Yeye Ibrahimu asijakuwako, MIMI NIKO" (Yohana 8:58).

Bwana Yesu anatumia lugha inayorejesha kumbukumbu ya kile Mungu alichomwambia Musa pale kichaka kilipowaka moto bila kuteketea. Hili lilikuwa ni dai la kuwa Mungu, Yeye mwenye uhai kwa Yeye Mwenyewe. Bila ya shaka, viongozi walielewa maana ya kile alichosema kwa sababu imeandikwa, "wakaokota mawe ili wamtupie" (Yohana 8:59).

Soma Warumi 4:1-5. Paulo anatumiaje kisa hiki cha Ibrahimu kudhihirisha ukweli muhimu wa wokovu kwa njia ya imani pekee, bila ya matendo ya sheria? Aya hizi zinasaidiaje kuelewa wazo la Ibrahimu kama baba wa wale wanaoishi kwa imani?

Ushuhuda wa Mariamu

Siku sita kabla ya Pasaka, Bwana Yesu alikuja kuwatembelea Mariamu, Martha na Lazaro kaka yao, ambaye Yeye Bwana Yesu alikuwa amemfufua. Simoni, aliyekuwa ameponywa ukoma, akaandaa karamu ya shukrani kwa ajili ya kile ambacho Bwana Yesu alikuwa amementendea. Martha alikuwa akihudumu na Lazaro alikuwa ameketi karibu na meza pamoja na wageni (*Yohana 12:1-8*).

Matendo ya Mariamu yalikuwa na umuhimu gani hapa? Ni kwa namna gani kitendo hiki kilikuwa ushuhuda unaoonesha kuwa Yesu alikuwa nani hasa? (*taz. Yohana 12:1-3*.)

Manukato haya yalikuwa aghali sana, yenye thamani ya ujira wa mwaka kwa mfanyakazi wa kawaida. Pengine Mariamu alileta zawadi hii kama udhihirisho wa shukrani kwa Mwokozi kwa msamaha wa dhambi zake na kwa kufufuliwa kwa kaka yake. Lakini ndipo akasikia kwamba Yesu alikuwa anakwenda kutawadhwa kuwa Mfalme. Katika hilo, angekuwa wa kwanza kumwonesha heshima.

Pengine Mariamu hakukusudia kitendo chake kionekane kwa watu, lakini Yohana anaandika, "Nayo nyumba pia ikajaa harufu ya marhamu" (*Yohana 12:3*). Yuda Iskariote akaibuka kwa kemeo, akisema kwamba yale manukato yangepaswa yauzwe na pesa yake wapewe maskini. Mara ile Bwana Yesu akamtuliza Mariamu kwa kusema, Basi Yesu alisema, "Mwache... maskini mnao sikuzote pamoja nanyi; bali mimi hamnami sikuzote" (*Yohana 12:7,8*).

Mada hii inayojirudia rudia ipo kwenye Injili ya Yohana yote. Yesu anajua kile kilicho ndani ya watu (*Yohana 2:24, 25; Yohana 6:70, 71; Yohana 13:11; Yohana 16:19*). Katika tukio hili kwenye karamu ya Simoni, Yesu anajua kilichomo ndani ya Yuda. Yohana ni mwangalifu kiasi cha kutaja kuwa Yuda alikuwa nani - mwizi aliyejitwalia vitu (*Yohana 12:6*).

Manukato ambayo Mariamu angepaka maiti ya Mwokozi, aliyamimina kwenye mwili Wake ulio hai. Kwenye maziko yake, uzuri wa manukato hiyo ungeenea kaburini tu; lakini sasa ikafurahisha moyo wake Kristo kwa uhakika wa imani na upendo wake... Kristo alipoingia katika giza la taabu yake kuu, alikwenda na kumbukumbu ya kitendo hicho cha udhati wa upendo ambao ungekuwa Wake kutoka kwa watu Wake waliokombolewa milele." - Ellen G. White, *Tumaini la Vizazi Vyote*, uk. 167, 168.

Bwana Yesu alijua kile kilichokuwa ndani ya moyo wa Mariamu na moyo wa Yuda Iskariote. Yeye anajua kilicho ndani ya moyo wako pia. Ukweli huu yapasa utuambie nini kuhusu hitaji la Kristo kama haki yetu, inayotubadilisha na kutufunika pia?

Ushuhuda wa Pilato Ambao Haukukusudiwa

Mara kwa mara, Yohana anaonekana kurekodi majaribio ya viongozi wa kidini kumkamata Bwana Yesu, ili kumleta kwenye mashitaka, na kumpa hukumu ya kifo. Mada iliyomo kwenye Injili ya Yohana, iliyonenwa mara kwa mara na Bwana Yesu, ni kwamba muda Wake au saa Yake ilikuwa haijafika, akimaanisha muda wa kusulubishwa Kwake (Yohana 2:4; Yohana 7:6, 8, 30; Yohana 12:7, 23,27; Yohana 13:1; Yohana 17:1).

Sasa saa ilikuwa imewadia. Yesu alikamatwa kwenye bustani ya Gethsemane, akaletwa mbele za Anasi, kisha Kayafa, kuhani mkuu, kisha mara mbili mbele ya Pilato.

Yohana ameita mashahidi wengi kutoka pande zote washuhudie kwamba Yesu ni Kristo. Sasa Yohana anamwita Pilato, liwali aliyesikiliza shitaka la Bwana Yesu. Huu ulikuwa ushuhuda muhimu kwa sababu Pilato alikuwa Mrumi, liwali au gavana na tena hakimu; mashahidi wengine walio wengi walikuwa Wayahudi na watu wa kawaida.

Hukumu ya Pilato inahusianaje na mada ya Injili ya Yohana? *Yohana 18:38; Yohana 19:4-22.*

Bwana Yesu aliletwa mbele ya Pilato mapema Ijumaa asubuhi (Yohana 18:28). Mpango wake ulikuwa kumtuma haraka huyu mfungwa akakutane na hatima yake. Lakini, mwenendo wa Yesu ulivutia usikivu wa Pilato. Liwali alimhoji Bwana Yesu kwa karibu na kusikia kutoka midomoni Mwake, "Mimi nimezaliwa kwa ajili ya haya, na kwa ajili ya haya mimi nalikuja ulimwenguni, ili niishuhudie kweli. Kila aliye wa hiyo kweli hunisikia sauti yangu" (Yohana 18:37).

Japokuwa huyu liwali hatimaye alimpa Bwana Yesu hukumu ya kifo, alimtamka Yesu kuwa hana hatia mara tatu (Yohana 18:38; 19:4, 6). Na juu ya ule msalaba aliandika maneno haya, **"YESU MNAZARETI, MFALME WA WAYAHUDI"** (Yohana 19:19), akikamilisha ushuhuda wake kwamba Yesu ni nani. Licha ya ushuhuda wake kuhusu Kristo kutokuwa na hatia, bado alimhukumu Yesu kifo.

Pilato alikuwa na Kweli Mwenyewe akisimama mbele yake na bado - kwa kuruhusu umati kumshurutisha - *hata hivyo Pilato alimhukumu kifo Bwana Yesu!* Ni mfano wa kusikitisha kiasi gani wa kutokufuata kile dhamiri na moyo wako vinachokuambia kuwa ni sahihi!

Tunaweza kujifunza nini kutokana na mfano wa Pilato kuhusu hatari za kuruhusu hisia za wengi, hata shinikizo, kutuzuia dhidi ya kufanya kile tunachoamini kuwa ni sahihi?

Ushuhuda wa Tomaso

Soma Yohana 20:19 -31. Tunaweza kujifunza nini kutokana na kisa cha Tomaso kuhusu imani na mashaka? Ni kosa gani kuu ambalo Tomaso alilifanya?

Kristo alitokea kwa wanafunzi Wake baada ya ufufuo Wake, walipokuwa wamejifungia pamoja kwenye chumba kwa sababu ya hofu. Tomaso hakuwa pamoja nao. Baadaye, alisikia taarifa za Ufufuo kutoka kwa wanafunzi wengine, lakini alionesha kutokuwa na matumaini. Hilo halikupelekana na taswira yake ya ufalme. Vilevile, lazima alikuwa amejiliza kwa nini Bwana Yesu alijidhihirisha Mwenyewe kwa wengine wakati yeye akiwa hayupo.

Tomaso akasema, "Nisipoziona mikononi mwake kovu za misumari, na kutia kidole langu katika mahali pa misumari, na kutia mkono wangu katika ubavu wake, mimi sisadiki hata kidogo" (Yohana 20:25).

Tomaso alikuwa akielezea masharti ya imani yake. Mtazamo huu kwa imani katika Yesu umeonekana ukirudiwa rudiwa katika Yohana. Nikodemo alipomjibu Yesu alisema, "Awezaje mtu kuzaliwa, akiwa mzee?" (Yohana 3:4). Yule mwanamke kisimani aliuliza, "Bwana, huna kitu cha kutekea, na kisima ni kirefu; basi umeyapata wapi hayo maji yaliyo hai?" (Yohana 4:11). Makutano waliokuwa wamelishwa mikate na samaki waliuliza, "Unafanya ishara gani basi?" (Yohana 6:30).

Ni huu mtazamo wa "ona ndipo uamini" ambao Injili ya Yohana inakabiliana nao. Wakati Bwana Yesu alipokutana na Tomaso baada ya Ufufuo, alimkaribisha aje, aone na aguse mwili Wake uliofufuka. Lakini ndipo Akasema, "Wa heri wale wasioona, wakasadiki" (Yohana 20:29).

Kila jambo atakalo Mungu tulisadiki, hakosi kutupatia uthibitisho wa kutosha wa kutufanya tujenge imani juu ya jambo lile. Kuwepo Kwake, namna ya tabia Yake, ukweli wa Neno Lake, mambo haya yote yamehakikishwa kwetu kwa shuhuda zinazovutia akili zetu; na ushuhuda huu ni mwingi. Hata hivyo Mungu bado hajaondoa uwezekano wa kuwa na mashaka. Yapasa imani yetu ijengwe juu ya uthibitisho, siyo maonesho." - Ellen G. White, *Jipatie Amani Moyoni (Steps to Christ)*, uk. 80.

Kwa njia ya Neno la Mungu, kwa njia ya Uumbaji, kwa njia ya uzoefu binafsi, tumepewa kiwango kikubwa sana cha uthibitisho kwa ajili ya imani yetu katika Yesu.

Kama mtu angekuuliza, Kwa nini unamwamini Yesu? Ungesemaje?

Ushuhuda Wetu Juu ya Yesu

Tena na tena, Yohana anapowasilisha ushuhuda wa Bwana Yesu, hoja yake ni kutuletea hitimisho: "Basi kuna ishara nyingine nyingi alizozifanya Yesu mbele ya wanafunzi wake, zisizoandikwa katika kitabu hiki. Lakini hizi zimeandikwa ili mpate kuamini ya kwamba Yesu ndiye Kristo, Mwana wa Mungu; na kwa kuamini mwe na uzima kwa jina lake" (Yohana 20:30, 31).

Hebu fikiria kama ungekuwa pale, wewe mwenyewe, katika mwili wako halisi, na kisha umwone Bwana Yesu akitenda miujiza hii mingi. Kwa vyovyote tusingeacha kuamini, sivyo? Tunapenda kufikiria hivyo; lakini kwa namna fulani, hata tunazo sababu zaidi za kuamini katika Yesu kuliko wale ambao waliona miujiza ile halisi. Kwa nini?

Ni yapi baadhi ya mambo tuliyo nayo leo ambayo wale walioishi wakati wa Yesu hawakuwa nayo, yawezayo kutusaidia kuamini? (*taz. kwa mfano, Mt. 24:2; Mt. 24:14; Mt. 24:6-8*).

Hiyo ni kwa sababu sisi hatuna taarifa nzito katika Injili ya Yohana tu, bali pia fursa kubwa zaidi ya kuona mengi ya yale ambayo Bwana Yesu na waandishi wengine wa Biblia waliyoyatabiri kwamba yatatimia, kama vile kuangamizwa kwa hekalu (Mt. 24:2), kuenea kwa injili duniani kote (Mt. 24:14), ukengeufu mkuu (2 The. 2:3), na dunia ikiendelea kuwa eneo na mahali palipoanguka dhambini (Mt. 24:6-8). Wakati wote wa maisha na huduma ya Yesu, wafuasi Wake walisalia kuwa kundi dogo la wanaume na wanawake walionyanyaswa, ambao, kwa viwango vyote vya kibinadamu, wangukuwa wamefutika kutoka katika historia muda mrefu uliopita. Wangewezaje kujua, kama tujuavyo, kwamba haya yote yangetokea? Nayo yamekuwa. Kwa kweli, imani yetu yenyewe ipo kama utimilifu wa unabii wa Yesu ya kwamba injili itakwenda ulimwenguni kote.

Na, leo, takriban miaka elfu mbili baadaye, tukiwa kama wafuasi wa Yesu, tunayo pia fursa adhimu ya kuubeba ushuhuda wa Yesu na kile ambacho ametutendea. Siyo kutokana tu na fikra za Nathanaeli, Nikodemo, mwanamke wa Samaria au mafundisho ya Mafarisayo tunapoweza kumjua Yesu kama Masihi kwa ajili yetu. Ni kwa kusoma Maandiko chini ya nguvu ya usadikisho ya Roho Mtakatifu ndipo tunapomkubali Yesu kama Mwokozi wa ulimwengu.

Kisha, kila mmoja wetu, kwa namna zetu, na kutokana na uhusiano wetu wenyewe na Mungu, tutakuwa na kisa cha kuelezea. Kisa chetu kinaweza kisiwe na matukio makubwa yavutiayo sana kama kuona wafu wakifufuka au kipofu kutoka kuzaliwa akiponywa, lakini hilo sio hoja. Jambo muhimu hapa ni kwamba tunamjua Yesu sisi wenyewe, na kwa namna yetu wenyewe tunamshuhudia Yeye, kama walivyofanya katika Injili ya Yohana.

Jifunze Zaidi: Soma Ellen G. White, "*Jaribio la Imani*," uk. 156 – 167, kwenye *Wazee na Manabii*; 334 – 354, katika *Tumaini la Vizazi Vyote*. Tomaso "akaanguka miguuni pa Yesu akilia: 'Bwana wangu na Mungu wangu!'"

Yesu alipokea ungamo lake, lakini kwa upole akakemea kutokuamini kwake: "Tomaso, wewe, kwa kuwa umeniona, umesadiki; wa heri wale wasioona, wakasadiki." Imani ya Tomaso ingempendeza zaidi Kristo kama angekubali kuamini ushuhuda wa ndugu zake. Ikiwa ulimwengu sasa utafuata mfano wa Tomaso, hakuna mtu atakayeamini hadi kuokolewa; kwa maana wote wanaompokea Kristo lazima wafanye hivyo kwa ushuhuda wa wengine.

"Wengi wanaotawaliwa na mashaka wanakuwa na kisingizio kwa kusema kwamba kama wangekuwa na ushahidi ambao Tomaso alikuwa nao kutoka kwa wenzake, basi wameamini. Hawatambui kwamba hawana ushahidi huo tu, bali wana ushahidi zaidi. Wengi ambao, kama Tomaso hungojea mpaka kila sababu ya kuwa na shaka imeondolewa kamwe hawatafikia tumaini lao. Kwa taratibu huthibitika katika kutokuamini kwao. Wale ambao wanajizoeza kutazama upande wa giza, na kunung'unika na kulalamika, hawajui wanachokifanya. Wanapanda mbegu za mashaka, na watawuna mashaka yao. Wakati imani na matumaini ni vya muhimu sana, wengi watajikuta pasipo kuwa na nguvu za kutumaini na kuamini." – Ellen G. White, *Tumaini la Vizazi Vyote*, uk. 418, 419.

Maswali ya Majadiliano:

1. Tofauti ya msingi katika namna ya kudhihirisha imani kati ya Ibrahimu na Tomaso ilikuwa ni ipi? Tunaweza kujifunza nini kutokana na visa vyao?

2. Kwenye darasa, ruhusu wale walio radhi kuleta ushuhuda wa Yesu, kama ambavyo tumeona katika Injili ya Yohana. Ingawa taarifa zinatofautiana, watu wanasema nini, na wote wanauchukua je ushuhuda kwa Bwana yule yule?

3. Pilato aliuliza swali la kifalsafa: "Kweli ni nini?" Leta jibu kwa swali hilo ukizingatia yote ambayo tumejifunza mpaka sasa katika kitabu cha Yohana.

4. Tazama unabii wa Danieli 2 na 7. Ingawa wale waliokuwepo wakati wa Bwana Yesu walikuwa na sura hizi pia, ni faida gani kubwa tuliyo nayo leo ambayo hawakuwa nayo wakati ule, kulingana na kuona unabii huo ukitimizwa na hivyo kuwa na sababu zaidi za kuamini?